

«ՀԱՍՏԱՏՈՒՄ ԵՄ»

ՀՀ ոստիկանության կրթահամալիրի պետ,
ոստիկանության գեներալ-մայոր

Մ. Բարսյան

«17»

2021 թ.



ԿԱՐԾԻՔ

**Առաջատար կազմակերպության՝ ՀՀ ոստիկանության կրթահամալիրի՝
Իզաբելլա Ալբերտի Իսկանդարյանի՝ «Աշխատանքի ազատ ընտրության
սահմանադրական իրավունքի իրականացման հիմնախնդիրները շուկայական
հարաբերությունների պայմաններում» թեմայով ԺԲ.00.02 «Հանրային
իրավունք» (սահմանադրական, վարչական, ֆինանսական, մունիցիպալ,
բնապահպանական, եվրոպական իրավունք, պետական կառավարում)
մասնագիտությամբ իրավաբանական գիտությունների թեկնածուի գիտական
աստիճանի հայցման ատենախոսության վերաբերյալ**

ՀՀ ոստիկանության կրթահամալիրի ակադեմիայի պետության և իրավունքի տեսության և սահմանադրական իրավունքի ամբիոնը, մասնակցությամբ՝ իրավաբանական գիտությունների թեկնածու Ռ. Ռ. Մարանդյանի, իրավաբանական գիտությունների թեկնածու Վ. Հ. Սայադյանի, Ա. Գ. Սաֆարյանի, Ա. Ս. Մարգարյանի և Մ. Բ. Մանուկյանի, քննարկեց Իզաբելլա Ալբերտի Իսկանդարյանի՝ «Աշխատանքի ազատ ընտրության սահմանադրական իրավունքի իրականացման հիմնախնդիրները շուկայական հարաբերությունների պայմաններում» թեմայով ԺԲ.00.02 - «Հանրային իրավունք» (սահմանադրական, վարչական, ֆինանսական, մունիցիպալ, բնապահպանական, եվրոպական իրավունք, պետական կառավարում) մասնագիտությամբ իրավաբանական գիտությունների թեկնածուի գիտական աստիճանի հայցման ատենախոսությունը և հանգեց հետևյալին:

Ատենախոսության արդիականությունը կասկած չի հարուցում: 2015 թ. սահմանադրական բարեփոխումների արդյունքում Հայաստանի Հանրապետությունում հռչակվել է սոցիալական շուկայական տնտեսություն, որը պահպանելով շուկայական տնտեսության հիմքերը՝ մասնավոր սեփականություն, տնտեսական գործունեության ազատություն և ազատ տնտեսական մրցակցություն, իր մեջ ներառում է սոցիալական արդարությունն ու ընդհանուր տնտեսական

բարեկեցությունը և նոր բովանդակություն հաղորդում աշխատանքի ազատ ընտրության իրավունքին: Ընդ որում, այս կարգավորումները հիմք են հանդիսացել պետության քաղաքականության օրենսդրական և ենթաօրենսդրական մակարդակներում սուբյեկտների իրավունքներն ու պարտավորությունները սահմանելու և միմյանց միջև փոխհարաբերությունները կարգավորելու համար: Կարևորելով նշված և այլ խնդիրների ուսումնասիրությունը՝ հեղինակը սույն աշխատանքի շրջանակներում փորձել է իրականացնել աշխատանքի իրավունքի երաշխավորման բացակայության պայմաններում աշխատանքի ազատ ընտրության իրավունքի իրացմանը և այս համատեքստում անհատ պետություն փոխհարաբերություններին վերաբերող հիմնախնդիրների համալիր գիտագործնական հետազոտություն:

Թեկնածուական ատենախոսությունը բաղկացած է ներածությունից, վեց ենթագլուխ պարունակող երեք գլուխներից, եզրակացությունից և օգտագործված գրականության ցանկից: Աշխատանքի այսպիսի կառուցվածքը, ընդհանուր առմամբ, համահունչ է այն խնդիրներին ու նպատակներին, որոնք իր առջև դրել է հեղինակը:

Աշխատանքի ներածության մեջ հիմնավորվում է հետազոտության թեմայի արդիականությունը, ներկայացվում թեմայի գիտական մշակվածության աստիճանը, հետազոտության օբյեկտը, առարկան, նպատակը և խնդիրները, հետազոտության սահմանները, մեթոդաբանական, տեսական, նորմատիվ և փորձարարական հիմքերը, գիտական նորոյթը, ինչպես նաև՝ պաշտպանության ներկայացվող հիմնական դրույթները, հետազոտության տեսական և գործնական նշանակությունը, արդյունքների փորձարկումը և ատենախոսության կառուցվածքը:

Ատենախոսության առաջին՝ «Աշխատանքի ազատ ընտրության իրավունքի պատմական և տեսաիրավական հիմնահարցերը» վերտառությամբ գլխում հեղինակը ներկայացրել է աշխատանքի ազատ ընտրության իրավունքի տեսաիրավական հիմնահարցերը և անդրադարձել աշխատանքի իրավունքի, աշխատանքի ազատության պատմական ձևավորմանը, դրանց հիմքում ընկած սոցիալ-տնտեսական զարգացումներին, աշխատանքի ընտրության ազատության և աշխատանքի ազատ ընտրության իրավունքի փոխկապվածությանը և տարբերություններին:

Աշխատանքի երկրորդ գլխում, որը կրում է «Աշխատանքի ազատ ընտրության իրավունքի միջազգային իրավական կարգավորումները» խորագիրը, լուսաբանված է մի շարք երկրների սահմանադրական դատարանների փորձը՝ կապված աշխատանքի ազատ ընտրության իրավունքի հետ, ինչպես նաև Վերանայված Եվրոպական սոցիալական խարտիայի, Տնտեսական, սոցիալական և մշակութային իրավունքների միջազգային դաշնագրի և Մարդու իրավունքների և հիմնարար ազատությունների մասին կոնվենցիայի ներքո այս իրավունքին առնչվող մեկնաբանություններն ու դատական նախադեպերը:

Ատենախոսության երրորդ՝ «Հայաստանի Հանրապետությունում աշխատանքի ազատ ընտրության իրավունքի սահմանադրաիրավական կարգավորումը» գլխում հեղինակը ներկայացրել է Հայաստանի Հանրապետությունում աշխատանքի ազատ ընտրության իրավունքի սահմանադրաիրավական բովանդակությունը և նշել

սոցիալական շուկայական տնտեսության սկզբունքների հաշվառմամբ աշխատանքի ազատ ընտրության իրավունքի զարգացման հիմնական ուղղությունները:

Ատենախոսության եզրափակիչ մասում շարադրված են հետազոտության կատարման արդյունքում հեղինակի կողմից արված եզրահանգումները:

Գիտական հետազոտության վերաբերյալ ընդհանուր դրական կարծիքի հետ մեկտեղ հարկ ենք համարում ներկայացնել հետևյալ նկատառումները՝

1. Թեև աշխատանքն աչքի է ընկնում գրագիտության ընդհանուր պատշաճ մակարդակով, այնուամենայնիվ, ատենախոսության մեջ նկատելի են նորմատիվ իրավական ակտերի տեքստերի բազմաթիվ ուղղակի մեջբերումներ: Վերջիններս, անշուշտ, ծառայում են հետազոտության խնդիրների լուծմանը, սակայն սահմանված ծավալի շրջանակներում հետազոտվող հիմնախնդիրների վերլուծական բաղադրիչի չափաբաժնի ավելացումը, մեր դիտարկմամբ, ավելի կբարձրացներ աշխատանքի գիտական արժեքը:

2. Գիտական նորոյթի տեսանկյունից վիճահարույց է պաշտպանության ներկայացվող հինգերորդ դրույթը: Չթերագնահատելով ատենախոսի կողմից իրականացված հետազոտության արժեքը, այնուամենայնիվ, կարծում ենք, որ վերոհիշյալ մոտեցումը չի համապատասխանում պաշտպանության ներկայացվող դրույթին առաջադրվող պահանջներին: Պետք է նկատի ունենալ, որ առաջարկվող դրույթը, ըստ էության, տեղավորվում է ՀՀ Սահմանադրության 57-րդ հոդվածի տրամաբանության մեջ և չի պարունակում գիտական նորոյթի էական տարրեր:

3. Թերի է ատենախոսության գրականության ցանկի ձևավորումը: Մասնավորապես, ատենախոսության՝ «Նորմատիվ իրավական ակտեր և միջազգային փաստաթղթեր» և «Մասնագիտական գրականություն» (96-րդ կետ) բաժիններում առկա են համակարգման խնդիրներ: Նպատակահարմար կլիներ, առանձնացնել «Էլեկտրոնային ռեսուրսներ» բաժինը՝ էլեկտրոնային աղբյուրները պատշաճ հերթականությամբ ներկայացնելու համար:


Ներկայացված նկատառումները կրում են մասնավոր բնույթ և չեն արժեզրկում ընդհանուր առմամբ հաջողված ատենախոսությունը, պայմանավորված են աշխատանքն առավել որակյալ տեսնելու ցանկությամբ:

Հետևություն. «Աշխատանքի ազատ ընտրության սահմանադրական իրավունքի իրականացման հիմնախնդիրները շուկայական հարաբերությունների պայմաններում» վերտառությամբ թեկնածուական ատենախոսությունը գիտական նորոյթ պարունակող, ինքնուրույն, ավարտուն գիտական աշխատանք է, որը համապատասխանում է Հայաստանի Հանրապետության կառավարության 1997 թ. օգոստոսի 8-ի թիվ 327 որոշմամբ հաստատված «Հայաստանի Հանրապետությունում գիտական աստիճանաշնորհման կանոնակարգ»-ով նմանատիպ աշխատանքներին ներկայացվող պահանջներին, իսկ հեղինակը՝ Իզաբելլա Ալբերտի Իսկանդարյանը, արժանի է իր կողմից հայցվող իրավաբանական գիտությունների թեկնածուի գիտական աստիճանին՝ ԺԲ.00.02-«Հանրային իրավունք» (սահմանադրական, վարչական, ֆինանսական, մունիցիպալ, բնապահպանական, եվրոպական իրավունք, պետական կառավարում) մասնագիտությամբ:

Առաջատար կազմակերպության կարծիքը հզաբեղա Ալբերտի Իսկանդարյանի՝ «Աշխատանքի ազատ ընտրության սահմանադրական իրավունքի իրականացման հիմնախնդիրները շուկայական հարաբերությունների պայմաններում» խորագրով թեկնածուական ատենախոսության վերաբերյալ պատրաստվել է Հայաստանի Հանրապետության ոստիկանության կրթահամալիրի ակադեմիայի պետության և իրավունքի տեսության և սահմանադրական իրավունքի ամբիոնի պետի պարտականությունների կատարող, ոստիկանության փոխգնդապետ Ա. Գ. Սաֆարյանի կողմից:

Քննարկվել և հավանության է արժանացել պետության և իրավունքի տեսության և սահմանադրական իրավունքի ամբիոնի 2021 թ. մայիսի 17-ի նիստում, արձանագրություն թիվ 13:

Ամբիոնի պետի պարտականությունների կատարող,
ոստիկանության փոխգնդապետ



Ա. Գ. Սաֆարյան

Ա. Գ. Սաֆարյանի ստորագրությունը հաստատում եմ:

ՀՀ ոստիկանության կրթահամալիրի պետի
տեղակալ, ինքը և կադրերի և ԱՀՏԱ բաժնի պետ,
ոստիկանության գնդապետ



Գ. Գ. Մալխասյան